

КНИГАЕН ТОДМАТСКОН

«Куэз» НИИЗЫ

Йоскалык библиотекаын Анастасия Шумиловалэсь выль бичетсэ эскеризы

Виктория КРАМОВА

27-тй шуркынмонэ, Удмурт кыллэн нуналаз, Йоскалык библиотека-лэн «Удмурт шаер» клубез Анастасия Шумиловалэн «Ку» бичетэныз тодматскыны өтчаз.

Анастасия Шумилова мадиз, кызы воштыськис солэн кылбуран манерыз но маин висьяське кыкетй кылбур бичетэз нырысетйезлэсь - «Дыр-эктонлэсь». Кылбурчи верамъя, нырысь-валысь со гожъяськис, кызызэ но малызэ валатэк, нош нырысетй книгаез потэм бере кылбуръёсыз бордын тросгес ужаны выриз, пöртэм кылбур формаосты уже кутыны тыршиз. А. Шумилова пусьемъя, кылбуръёссэ со гожъя озы, соос аслыз мед кельшозы шуыса.

- Мыным тунсыко удмурт кыллэн структураез, солэн аспöртэмлыкъёсыз - соин кыллэсь йöспöртэм тодметъёссэ кылбуръёсы пыр возматэме потэ. Кöня ке гожъямъёсам удмурт кыл будосэн чöшатэмын, малы ке шуоно тросэз пусьё удмурт кыллэсь небыт чузъяськемзэ. Но будос олокыче но луыны быгатэ - нег но, бышкаськис но, озы ик котькуд кылын умойзэ но, уродзэ но вераны луоно. Книгалэн «Ку» нимыз сярис ке верано, со герзаськемын дуннез пöртэм сямен пöдонэн. Улонез куддур валаськом, со сярис малпаськыса, нош мукет дыре - мугор пыр, ку пыр, шуыны луоз. Берло дыре мыным «куэн шöдон» матынгес вал, - вераз Анастасия Шумилова.

«Ку» книга пумысен малпанъёссэ шараяны лыктйзы тодосчиос но. А. Шумиловалэсь «Дыр-эктон» нырысетй бичетсэ дунъяса, литература-



А. Шумилова кылбуръёссэ лыдзэ.

ез эскерис Вера Пантелеева пусйиз, отын печатлам текстъёс солэн сюлмаз пыризы шуыса. «Ку» бичет пумысен суро-пожо мылкыдыз кылем: А. Шумиловалэн выль кылбуръёсыз медийной культура вылын будэмъёслы матынгес, пе, луозы, оло. Тодосчи пусьемъя, котькытын эсэпсэ валаны быгатано, нош куд-ог текстъёсаз автор солэсь палэнске.

Виктор Шибанов тодосчи, «Ку» книгаыс одйг текстэз бырйыса, солы анализ лэсьтйз. Отысь изъянъёсты шараяса, со возматйз, маин зеч кылбур аламаезлэсь висьяське. Кылбурчилы но, жыгтэ вуэм студентъёслы но пайдаё луиз сыче пыр-поч эскерон. Виктор Шибанов пусйиз: егит дыръяз, кылбуръёс гожъякуз, солэсь кылбуръёссэ озы пыр-поч эскерем-лусьем Владимир Романов нимодано кылбурчи.

Алексей Арзамазов тодосчи но кылбурчи вераз, Россиясь мукет улосъёсысь гожъяськисъёс удмурт литерату-

раез выль дунъяло но солэсь аспöртэмлыко луэмзэ пусьё шуыса. Али Алексей Арзамазов Казанысь Алексей Соломатин кылбурчиен но критикен удмурт авторъёслэн ужъёсынызы зуч но удмурт кылъёсын антология дасяло. Нырысь ик соос Анастасия Шумиловалэсь кылбуръёссэ берыктыны басьтйськиллям. Тодосчи верамъя, зуч кылэ берыктйсьёс зеч кылъёс верало Анастасиялэн кылбуръёсыз сярис.

Кылбурчи но «Удмуртия» издательстволэн редакторез Сергей Матвеев А. Шумиловалэн кылбуръёсызлы синмаськемзэ вераз. Сергей Матвеев малпамъя, «Ку» книгаын трос визьмо но чебер тысьёсыз, кудъёссэ пумтэм-йылтэм куадам потэ. Кылбурчи верамъя, А. Шумиловалэн кылъёсын шудонтёсыз пöрмыто пöртэм пужыос но мылкыдъёс.

Ужрадын А. Шумиловалэсь чуръёссэ шара лыдзйзы

мукет егит гожъяськисъёс. Женя Корепанова лыдзйз Ижкар сярис кылбурез. Нылаш верамъя, солы Иж уг кельшы, нош Анастасия Шумилова кылбуръёсаз усътэ Ижкарез яратэмзэ. Женя пусйиз, «Кар» кылбурез лыдзёме бере солэн Ижкар пумысен мылкыдыз воштыськис шуыса.

Богдан Анфиногенов кылбурчи книгалэн вылтусыз сярис вераськис: солы кельшем, кылбуръёс но суредъёс ог-огенызы герзаськемын шуыса. Книга, пе, вотэсын улйсь туалал кылбуретлэн тенденциосызы туж тупа.

- Дуннеын али одйгез тодмоез кылбурчи - Рупи Каур, со тодмо луиз «кышномурт» кылбуръёсыныз но суредъёсыныз. Азыло со ужъёссэ «Инстаграме» пуктылэ вал, нош али книгаосыз миллион тиражъёсын пото ини, - малпанзэ усътэ Богдан Анфиногенов.

Кылбуръёс сяна, ужрадын крезьгур но чузъяськис. Анастасия Шумиловалэн кылбуръёсызъя кырзаныз та вакытлы гожтызы пöртэм жанрен ужас крезьгурчиос. Библиотекаын чузъяськисы Сергей Кирилловлэн - Алнашысь бардлэн - «Постудмуртъёс» кырзанэз. Post-dukес-лэн (Чудья Женилэн электронной крезьгуръя проектэз) алигес потэм «Горд вужер» альбомаз 4 кырзан Анастасия Шумиловалэн чуръёсызъя - одйгэз, «Веттан гурез», кылзйзы библиотекае люкаськемъёс. «Горд вужерез» кылдытонэ пыриськис Кирилл Кириллов - bobolenin группалэн кылдытысез. Жытын со кырзанъёс быдэстйз но вераз, bobolenin-лэн выль альбомаз кöня ке кырзан Анастасия Шумиловалэн кылбуръёсызъя гожтэмын луоз шуыса. ***

Кылбурез куадазы

Лариса ДМИТРИЕВА

Туэ Анастасия Шумилова 2-тй кылбур бичетсэ поттйз, ортчытйз книгаеныз тодматскон жыгъёс.

Кыкетй книга - «Ку» - критикъёслы секытэнгес сётйське кадъ, нырысетйеныз чöшатыса. Та дырозь пыр-поч рецензиос таизлы бичетлы öвöл на. Валаны кулэ, мар ке выльзэ вераз-а автор? Яке удиссэ огсямен азинтэ?

А. Шумиловалэн нырысетйез «Дыр-эктон» книгаез лыдзйсь кие вуэм бере, ми валамы: та - удмурт литературалэн туалал тусыз. А. Шумилова зеч-зеч азинтэ поэзилэсь филологической öрзэ. А. Шумилова кыл дуннеын эркын

шока, зуч литератураен но авторъёсын кусып возе.

Зуч критикъёс но пусйизы: кылбурчи «удмурт колоритэз возматэ». Со вакытэ ик гожъямъёсаз туалал дуннелэн тодметъёсыз пычамын. А. Шумиловалэн кылбуръёсыз пачылмемын яркыт буёло, жог вошъяськис образъёсын, соос, мон малпамъя, кельшо Америкаысь Уэс Андерсон режиссёрлэн улонлы шумпотйсь, ироничной (серекъясь) но философской пуштросэн чебер суредо фильмъёсызлы.

Ма, «Ку» книгаезлэн вылтусыз но сыче ик - синмез кыске йöспöртэм иллюстрациосыныз. Соос шоккетон, эпатаж (дэймытон) понна книгае

пыртэмын öвöл, малпасько. Кылсярысь, гольык воргорон чорыгась. Яке асныз кылбурчиен тунсыко фото: отын А. Шумиловалэн пельпумъёсыз гольыкесъ.

Книгаыс иллюстрациосты котькуд лыдзйсь ас сяменыз валэктэ, аслыз кельшытэ яке уг. Шуом, суредъёс лыдзйсьлы ярало ке, со, дыр, авторен огкадь интернет-ресурсъёсыз лыдзэ, огкадь фильмъёсты учке, ужрадъёсы ветлэ.

Мон малпамъя, А. Шумиловалэн «гольык» фотоез юнматэ «Ку» книгагальсэ валтйсь идея: мугорлэн шöдонъёсыз пыр адямиез но дуннез валэктон.

Презентация дыръя Виктор Шибанов литературовед

тодаз вайиз, кызы Владимир Романов кылбур гожъяны дышетэ вал. А. Шумиловалэн бичетысьтыз одйг кылбурзэ эскерыса, со возматыны быгатйз, кыче куронъёс пуктэ вал В. Романов кылбурлы но аслыз гожъяськис муртлы. Озы аспöртэмлыко амалэн шараяськисы А. Шумиловалэн кылбурезлэн тырмымтэосыз.

- Нокин уг адзы, номыр уг шуы, соин кылдо сыче чуръёс, - шуиз А. Шумилова кылбурзэ «куадам» бере...

Авторлы азинскон понна кулэ лыдзйсьлэн вазиськемез, мылкыдыз - тае возматйз Национальной библиотекалэн ужрадэз. ***

МАЕ ЛЫДЗÖНО

Вормись книга умой вузаське

Анастасия ШУМИЛОВА

4-тй толсуре «Большая книга» премилэн лауреатъёсыз тодмо луизы. 2018-тй арын Россиясь литература удисысь валтйсь призэз угтйз Мария Степанова «Памяти памяти» романэз понна.

2-тй инты Александр Архангельскийлэн «Бюро проверки» романэз басьтйз, нош 3-тй - Дмитрий Быковлэн «Июнь» романэз. 1-тй инты понна 3 миллион манет, 2-тй инты понна - 1 но жыны миллион, 3-тй инты понна сётйське 1 миллион. Нимысьтыз призэн пусьемын Людмила Петрушевская литератураын трос лэсьтэмез понна. Кылпумысь, чапак Людмила Петрушевская 13 ар талэсь азыло премилэсь нимзэ малпаз.

Вормисьёсты арлы быдэ бырже Литература академия - отчы ог 100 адями пыре: культура удисын тыршисъёс, тодосчиос, журналистъёс, писательёс, ужбергатйсьёс. Ошоры лыдзйсьёс но яратоно книгаоссэз бырже. Таяз арын соос Дмитрий Быковлэн «Июнезлы» тужгес трос куара сётйзы. Озы ик лыдзйсьёслы Андрей Филимоновлэн «Рецепты сотворения мира» но Олег Ермаковлэн «Радуга и Вереск» книгаоссы кельшиллям.

«Памяти памяти» - Мария Степанова кылбурчилэн но эссеистлэн нырысетй романэз. Книга-яз писатель, аслаз семьяезлэн историез сярис вераса, огдыре малпаське йырсазылэн ужамез сярис - писательлы тунсыко, кызы нимысьтыз адямиос но оглом калык йыразы поно но тодазы возё улонысь, историез пöртэм учыръёсты. Жюрилен членэз - Борис Куприянов издатель но публицист - вера, али троссэ писательёсты тодэ ваёнъёсын герзаськем ужпумъёс сюлэмшугъяськыто шуыса.

«Большая книга» премилэн валтйсь директорез Георгий Урушадзе пусьемъя, котькуд ар Москва-лэн кивалтэтэз премилэн лауреатъёсызлэсь книгаоссэз поркарысь библиотекаосы дунтэк ыстэ. Умой луысал, шуэ Георгий Урушадзе, вань городъёсысь библиотекаос озы узырмысалзы ке.

«Большая книга» премиен пусьем книгаос зеч вузасько. Кылсярысь, Ижкарысь магазинъёсын «Памяти памяти» книга та дырлы öвöл - вань экземпляръёсыз вузамын. ***